

Dr. Leo, Director di Hospital:

"SAN PEDRO HOSPITAL TA UN NECESIDAD CUBIRA ASUNTO HURIDICO"

ORANJESTAD (AAN): Den un entrevista cu DIARIO, Dr. J. Leo, director di Hospital Dr. Horacio Oduber, a referi, entre otro puntonan, na e problema di acomodacion cu e centro di salud menciona ta confrontando, y dentro di e contexto aki, e tema di San Pedro Hospital a bini acerca.

Dr. Leo a comenta cu tin un total di seis persona mentalmente retarda ademas di no menos cu 40 anciano cu ta biba den Hospital cual problema pa casi 20 aña caba no a haya un solucion. Esaki ta causando un problema masha grandi mes, mientras cu e proyecto di San Pedro Hospital a bira un speranza ora a cuminsa na aña 1991 cu intencion di bin cla na 1992.

"Nos tabata tin bastante speranza ora e proyecto di construccion di San Pedro Hospital a bini acerca. E promesa tabata pa e bini cla na mediados di aña 92. Despues mi a hiba un gran decepcion ora di a tende cu e lo mester a habri na November 92. Despues a wordo papia cu na cumzamento di aña 93 e lo cuminsa funciona, pero nada. Mas desilusion, y pio

ainda ora di a tende cu e proyecto a bira un wega huridico cu tin e chance di dura varios luna mas pa e caba y esaki ta nifica un peso enorme riba nos comunidad. Bo no por hunga un wega huridico cu un proyecto asina importante" Dr. Leo a remarca.

CIRUJANONAN NO POR OPERA: El a bisa tambe cu e mes, como cirujano mester a opera dos per-

sona riba Dialuna cu a pasa y no por a haci esey pasobra no tin lugar na Hospital. Mas cirujano ta pasando den e mesun situacion cune y nan ta singi nan mes para lombra contra muraya, pa falta di spacio na Hospital.

"Mi pregunta ta, ki dia San Pedro Hospital lo bay habri, pa alomenos nos por conta cu 40 cama ocupa pa hendenan di edad avanza cu ta ricibi cuidio intermedio y cu no tin ningun malesa cu nan?. Ta pueblo mes ta keda cu e problema cu no tin lugar na Hospital. Si bo ta saca 40 hende for di Hospital, e ta dunabo un flexibilidad enorme, y tur esaki pa un sim-

ple causa", Dr. Leo a bisa.

MESTER AMPLIA POLICLINICA: Dr. Leo a menciona, riba e problema di acomodacion, cu Eerste Hulp tampoco ta dispone di lugar suficiente pa hende malo keda. Actualmente ta dos of tres paciente maximo por worde trata alavez eyden. Si un di e pacientenan mester warda riba un especialista, e persona aki tin dos opcion: of ocupa un spacio den e sala di observacion, loke ta dificulta atencion pa otro, of bay warda den sala di spera, loke ta resulta hopi molestioso pa hende cu mester soporta algun dolor fuerte.

"Mi a presenta un proyecto pa construi un policlinica completamente nobo, loke ta sumamente necesario. Pero ken ta hacie?. Ken ta core cu e gastonan involvi?. E plan aki mester bay Hulanda pa financiamiento pasobra Aruba no ta conta cu e recursonan necesario. Nos casi nunca ta haya donacion, compara cu otro paisnan unda un of otro sector ta haci donacion sea financiero of di aparatonan. Coastal 2 aña pasa a haci un bon donacion y den pasado Lago a yega a naci esey tambe. Yudanza cu equipo por duna nos un gran alivio financiero tambe.

Mi ta considera cu ampliacion di Eerste Hulp ta un necesidad enorme, y e meta di e proyecto menciona ta pa concentra tur e doctornan den un policlinica grandi, loke por evita e tardanza di specialis-

tanen cu pa un of otro motibo nan por demora pa yega Hospital ora nan ta worde requeri, ora nan mester sali di nan consultorio priva. Hopi doctor na Aruba no por traha den e Hospital pa falta di spacio" segun Dr. Leo a relata. Tambe el a bisa cu e tin entendi cu den e tereno dilanti Hospital ta den construccion un edificio cu lo bay bira un clinica

priva, loke riba su mes e ta haya un bon idea".

Dr. Leo a descarta e posibilidad cu aumento di paciente na Hospital ta debi na aumento di poblacion door di hende stranhero. El a bisa cu entre turista y residente di afo, aña pasa a worde atendi apenas 200 persona loke no ta haci peso importante riba e problema di acomodacion.